

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

31 Janvier 2020

05 Jamadi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Qui santà ene Musulman ?

Allah dire dans Quran Shareef: « **Mo fine créer Jinns et dimounes pou ki zot adore Moi.** » (Az-Zariyat 51 : 57)

Et pour être plus explicite, Allah (swt) dire: « **Ô bane croyants! Craindre Allah couma Li mériter ki ou craindre Li. Et pas mort excepter en complète soumission (à Li).** » (Al-Imran 3 : 103)

Allah (swt) ouler faire nous comprend clairement ki celui ki mort sans ki li fine conne so créateur li mort spirituellement comme ene aveugle, et Quran Shareef dire nous aussi : « **Celui ki aveugle lor la terre pou aveugle aussi dans l'au-delà [la vie après la mort].** » (Bani Isra'il 17 : 73)

Sa verset là li ene défi sérieux pour tous bane ki dire ki zot bane musulmans. Mais ki la situation aujourd'hui ? La majorité de bane musulmans zot couma bane passagers à bord d'ene bateau ki fine prend de l'eau [ene bateau ki fine envahir

par de l'eau kot de l'eau fine rentre endans] et ki fine perdi so bane rames et ki trouve li balloté par bane gros vagues. Eski nous pé alle alors vers nous la perte ? Sans aucaine doute [si situation continuer coumsa c'est vers nous la perte même ki nous pou aller – nous bane musulmans] et d'ailleurs, le Quran Shareef dire: **« Par le temps! L'homme li en vérité dans perdition, sauf bane ki croire et ki faire bane bons travaux, ki enjoigne ene à l'autre la vérité et ki enjoigne ene à l'autre la patience [l'endurance]. »** (Surah Al-Asr, Chapitre 103)

Le Saint Prophète (saws) fine ene jour dire Abu Darda (ra), *« Ô Abu Darda, considère-toi comme étant mort à chaque moment. Personne pas conner quand li pou mort ni li gagne ene signe de so la mort. Alors agir comme-ci to pou mort bientôt [dans ene moment] et mette toi prêt pou zoine li (la mort). »* Et en d'autres mots, pour to zoine, Allah.

Anou pose nous la question et anou réponde en toute franchise et en toute sincérité : Eski nous prêt pou mort comme ene musulman? La réponse li trouve au fond de nous-mêmes mais eski nous pou ena vraiment le courage pou faire face la vérité ? Peut-être eski li seulement convenable pour nous pou fer semblant pas conne nannié, faire comme-ci de rien été ou pou cause menti, mais Allah nous créateur conne mieux ki nous saki ena dans sakaine nous lé cœur.

Oubliant tout et en négligeant tout, l'homme li tellement engagé dans la poursuite de bane gains et bane plaisirs matériels, ki li fine oublié ki li pou bizin très prochainement rencontre la mort. La civilisation moderne et tout saki moderne attire bane musulmans, spécialement nous jeune génération. Sa bane musulmans là zot fine maintenant vine bane esclaves du plaisir tandis ki bane principes de l'Islam et la *Sunnah* du Saint Prophète (saws) fine disparaite de zot l'âme et de zot la caze. Et dans zot lé cœur ena maintenant bane tendances et principes non-islamiques.

Ena ene la ligne de démarcation bien claire entre ene musulman et ene non-musulman. Malheureusement la majorité de bane musulmans fine traverse sa la ligne de démarcation là, fine traverse tout limite et si zot pas retourne dans le cadre islamique, zot pou gagne ene déception terrible et zot pou risquer trouve zot parmi bane perdants.

Alors ki bizin faire pour retourne dans le droit chemin? Répentir et demande pardon et vive enfin comme ene bon musulman. Allah dire: « **Et quant à bane ki lutter pour Nous cause, Nous pou en vérité guide zot lors Nous chemins. Allah Li en vérité avec bane ki faire le bien.** » (Al-Ankabut 29 : 70)

Sa verset là veut dire ki nous bizin toujours vivre comme ene bon musulman et agir comme tel, et Allah (swt) dire encore: « **Sa livre là, péna aucaine doute là-dans, li ene guide pour bane pieux [Muttaqi].** » (Al-Baqara 2 : 3)

De ce fait, personne pas pou capave bénéficier d'aucaine guide (guidance) si li pas ena aucaine respect pour so bane devoirs envers Allah.

Le Saint Prophète (saws) fine dire: « *Celui ki suive l'exemple de bane les autres li forme partie de sa bane là.* » Et c'est exactement saki fine arrivé à bane pays musulmans. En vérité bane musulmans d'aujourd'hui fine copié la façon de vivre de bane non-musulmans, ene tel façon ki li de nature contre bane principes islamiques. Et pourtant l'Islam fine donne bane principes lor quoi ene musulman bizin base li pour ki li amène à bien so mission lor la terre. Si nous suive le Quran Shareef et le *Sunnah* du Saint Prophète (saws), nous pou trouve sans doute bane la lois et bane principes ki clairs et sains pour assure la réussite dans sa le monde ici-bas là et dans *Aakhérat*.

Pourquoi sa nouvo génération là fine subir ene tel kalité changement? Eski c'est à cause zot fine prend la façon de vivre islamique et façon habiller islamique comme ene la mode ki fine dépassé, ki arriérer ou eski ena ene l'autre raison ? La raison li pourtant bien simple et li là devant nous lizié: bane musulmans fine abandonne bane l'enseignements islamiques, et zot lé cœurs rempli avec faussetés. Ene exemple parmi tant d'autres c'est la façon et la liberté ki bane madames et tiffilles musulmans prend dans zot linges, dans façon ki zot habiller ; c'est-à-dire peu importe la façon ki zot habiller, zot la tête toujours découvert. Tandis ki le Quran Shareef dire clairement: « **Et dire zot [bane musulmanes] rabatte zot voile lor zot poitrine. Zot capave montrer zot beauté [Zinat] seulement à zot mari...** » (An-Noor 24 : 32).

Allah (swt) ensuite mentionne ene la liste de bane dimounes avec qui ene madame ou fille musulmane capave montrer so parure. Allah conne tout kitchose

et Li conner saki bon pour nous et saki malsain pour nous, et dans So sagesse Li fine décrète sa bane la loi là.

De ce fait nous pas gagne droit questionne kifaire Allah fine mette ene telle la loi. Alors kifaire bane musulmanes [ki li tifille et madames] zot néglige So commandement? Pourquoi ene musulman li permette à so madame pou agir contre sa bane l'enseignements là ? Kifaire bane parents musulmans permette à zot bane tiffilles ki pas marier pou adopter ene telle l'attitude? Eski ena ene bon raison pour ki bane musulmanes pé alle dans la société de bane les autres sans ki zot habille zot convenablement et en désobéissant la loi d'Allah?

Ene jour Asma (ra) la sœur de Hazrat Ummul Mumineen Aisha (ra) fine paraite devant le Saint Prophète (saws) avec bane vêtements fins ki laisse apercevoir certains parties de so lé corps. Le Saint Prophète (saws) fine dire li: « *Ô Asma, quand ene tifille atteindre la puberté, li convenable ki aucaine partie de so lécorps paraite excepter ça - et li montrer so visage et so la mains.* »

Mais aujourd'hui l'habillement de bane musulmanes [tiffilles et madames musulmans] li identique à celui de bane non-musulmanes [tiffilles et madames non-musulmans]. Et naturellement tout possibilité exister pour bane péchés de la société infiltrer partout, et alors nous népli capave distinguer ki sanlà musulmane [ki sanlà ene fille ou madame musulmane] et ki sanlà pas musulmane. Si seulement nous capave retourne à la façon islamique pou habiller, ene façon ki maintenant considérée comme étant arriérer et démodée, et alors si nous retourne à bane pratiques et façons habiller islamique, bane vices de la société pou disparaite et bane ki prêche le mal pou être détruits.

Le Saint Prophète (saws) fine toujours pratique saki li prêcher et so bane compagnons fine toujours suivre so pratique. Chaque pas du Saint Prophète (saws) li ene l'exemple de moralité pour ene musulman et chaque mot de so bane l'enseignements li ene moyen pour obtenir la bénédiction d'Allah.

Ki bane raisons nous capave donner pou sa l'état déplorable des choses sinon ki nous fine néglige bane principes islamiques petit à petit et boute par boute. Bane *Imams* de bane Masjids, bane savants, bane théologiens musulmans zot à blâmer pour sa dégradation morale et spirituelle là. Zot pas fine faire zot devoirs comme bane *Ulemas* et zot fine évite prend zot bane responsabilités. Zot pas fine prêcher

saki zot fine apprane et zot fine faillir dans zot bane travaux en tant ki porte-flambeau du message du Saint Prophète (saws). Enfin, zot fine préfère alle avec vague de bane dimounes au pouvoir [et ki ena Cash] pour ki zot pas perdi zot popularité.

Certains dimounes [ki zot l'esprit rode convaincre zot autrement] kan pou tende moi ou lire sa Khutba là pou capave penser ki mo pé exagérer lors là, mais la preuve li facile pou trouver. Demande à ene jeune musulman comment eski li bizin purifier li après ki li fine salir li [ou sois li fine vine *Junub*] et demande li bane les autres principes de base de la foi islamique; et l'ampleur de l'ignorance pou convaincre ou peut être de la gravité de la situation.

Alors, nous tous, nous bizin prend la résolution et la détermination de bien accomplir nous devoir vis-à-vis de nous créateur pour bane bontés sans limites ki Li déverser lor nous. Nous pé vive lor So la terre, nous pé mange So manger et nous pas pé remercier Li. Eski Li fine prive à ene seule de So bane créatures de so manger quotidien quoi-ki sa créature là néglige so bane devoirs envers Li ? Non. Li fine donne li tout saki li bizin mais sa créature là li, li oublier ki ene jour na pas ene jour li pou bizin alle rendre compte pou sa négligence là.

Pense bien, l'Islam li ene trésor inestimable ki ene créateur rempli de miséricorde fine donne zot. Azordi li trouve li piétiné par bane non-musulmans dictateurs et ki prive bane musulmans de zot bane droits humains. Quoique certains musulmans sincères ouler préserve zot bane droits pour pratique zot Islam en paix ; zot oulé zot l'indépendance et vive en paix mais sa bane dictateurs impitoyables non-musulmans là pé rasse sa droit pou pratique zot la foi là de zot et pé force zot pou accepter et pratique zot propre culture et la foi non-musulmans. Bane tilles musulmanes forcés pou marier sa bane non-musulmans là et l'idée derrière sa c'est pou faire zot délaisse zot la foi et donne naissance à bane non-musulmans. C'est saki pé arriver dans la province autonome chinois de Xinjiang. Bane Ouïgours zot bane musulmans, ki minoritaire dans la Chine mais en majorité dans la province de Xinjiang, ki situé au nord-ouest du pays. Sa peuple Ouïgour là li ene peuple Turcophone, et zot présent aussi dans Kazakhstan, dans Ouzbékistan, dans Kirghizistan et dans Turquie.

Pareil couma bane *Royingyas* de Myanmar (Birmanie), zot bane cibles de bane persécutions extrêmes à cause de zot la foi. Le gouvernement Chinois fine

emprisonne zot dans bane camps de ré-éducation politique pour faire bane lavages cerveaux avec zot pou convaincre zot pou quitte l'islam. Zot pas gagne droit pou pratique l'islam tout comme bane musulmans Ahmadis pas gagne droit pratique l'islam dans Pakistan, et même plus pires ki sa pé passer dans la Chine [Xinjiang]. Zot pé passe par bane multiples atrocités seulement à cause de zot la foi.

En vérité, pareil couma mo fine dire zot à travers bane révélations divines [et sa depuis le commencement de la Manifestation Divine] ki fine recevoir lor bane plans de sa bane infidèles ki fine dépasse tous limites là, la colère d'Allah pou trappe zot ene par ene, et ravage ki sa virus ki appelle coronavirus pé faire li ene exemple explicite de sa vengeance divine là [et nous fine trouver couma toutes sortes de virus aussi fine fer surface depuis le début de la Manifestation Divine].

Sa bizin servi couma ene leçon pour nous tous, bane musulmans. Bane non-musulmans pé tombe lor nous pour oblige nous pou abandonne l'islam. Certains pé servi la force, et certains pé servi la douceur pour attirer ou vers zot cultures, pou inciter ou pou abandonne l'islam pour gagner bane gains et bane plaisirs matériels.

Pense à bane souffrances de ou bane frères et sœurs musulmans ki en minoritaires dans zot pays, et ki pé trouver zot privés de zot bane droits humains fondamentales pou pratique zot la foi.

Bane non-musulmans percevoir l'islam comme ene danger pour zot. Zot gagne peur pou trouver le monde revivre la gloire et la victoire de l'islam. Alors lever, casse zot sommeil. Li népli l'heure pou dormir. Sa le monde là li temporaire et li pas pou servir ou à nannier auprès d'Allah. Saki pou précieux pou ou c'est ou la foi et z'effort ki ou pou faire vers la construction de l'islam, ou islam, pour ou Bondié ki Unique (Allah). Alors, nous bizin oublier nous bane différences. Pas dire ki intel intel pas musulman si celui là affirmer ki li ene musulman et ki li content Allah et So prophète Muhammad (saws), si celui-là ena ene ferme croyance dans le **Shahada** « *Laa-Ilaaha Illallah Muhammadur Rassullullah* ».

Ou, bane musulmans, guette autour de ou, ene par ene ou bane droits islamiques pé envolé : interdiction pour bane madames musulmanes pou mettre le *Hijab* (le voile), interdictions pou donner *Azaan* (l'appel à la prière), interdiction pou garder

Roza dans mois Ramadan, interdiction pou garde la barbe et pou habiller de façon islamique parski ou capave passe couma bane terroristes ! Eski ou pas pé trouver couma sa bane là pé rasse l'islam de ou ? Eski ou pou laisse sa bane dimounes là dicter ou la foi ? Eski zamais alors nous pas pou uni ? L'Union fait la force. Sans l'union de bane musulmans, et sans ene confiance absolue en Allah, bane musulmans pou continuer souffert.

Allah fine envoie zot So Khalifa – Élu par Allah (le Khalifatullah) pour guide zot dans zot la lutte pour la vérité et pour zot liberté islamique. C'est le Khalifatullah ki pou guide zot en vérité lor sa bon chemin là, et à travers nous bane invocations en ene seul la voix, bane anges pou dessane pou anéantir bane infidèles par la volonté d'Allah. Pas reste en place, sans la vie, et pas reste sourde à sa l'appel là. Préservez zot Islam avant ki li trop tard. Anou lutter nous tous ensemble. Bane infidèles, bane l'ennemies de l'islam, bane persécuteurs de bane musulmans bizin impérativement goûte la colère, la malédiction et la punition d'Allah.

Anou change alors nous la vie, suive bon guidance, nous tenir nous tous ensam à la corde d'Allah, nous vive comme bane musulmans et nous mort sans frayeur comme bane musulmans.

Ki Allah gagne pitié de bane musulmans et renverse bane plans de bane infidèles, ki ena ene la haine acharnée contre l'islam. Ki Allah fraye pou nous le chemin vers la victoire en ouvrant le cœur de bane musulmans vers ene l'unité sans faille.
Insha-Allah, Ameen.